

LOU BON VOTE...

Lou Councèu regionau de Prouvènço-Aup-Costo d'Azur a vouta un amendamen que pourgis un buget escasamen pèr la lengo...

Pajo 1



Prouvènço aro

Abriéu 2011

n° 265

2,10 €

Ais

8 de mai 2011

Festenu d'ou Tambourin

La Vilo sestiano, fidèlo à uno tradicioun anciano pèr l'estrumen emblemati de Prouvènço, aculis, lou dimenche 8 de mai, pèr lou vinto-seisen cop, lou Festenu du Tambourin.

Aquelo manifestacioun òriginalo countribúis à la reconeissènço dóu galoubet-tambourin, e bouto en eisergo tant soun aspèt tradiciounau que countempouran.

Dous tèms fort marcon aquéu festenu : lou recampamen interregionau di tambourinaire e lou Forum dóu Tambourin.

Lou recampamen interregionau di tambourinaire à 10 ouro 30 reúnis sus lou Cours Mirabeau, coume à l'acoustumado, 200 à 300 tambourinaire que dins la gau e la counvivènço, renoson emé li rassemblamen d'antan pèr jouga ensèn, lou virtuose coustejo lou debutant, soulet lou plasé de jouga coutrio es impourtant.

Lis èr de musico soun eisecuta souto la direicioun de Sebastian Bourrelly, prouffessor de galoubet-tambourin au counservatòri de z-Ais. Li participant arribon de tout l'espaci geografic ounte se pratico aro lou tambourin, despièi li ribo dóu flume Var enjusco aquéli dóu Vidourle, siegue li despartamen de la region Prouvènço-Aup-Costo d'Azur emai aquéli de la Droumo, dóu Gard e de l'Eraut.

Aqueste recampamen es d'uno part un moumen privilegia de rescontre, de partage entre musician e, tambèn, un encantamen pèr lou publi toujours fidèle e toujours mai noumbrous.

Lou segound grand moumen, lou Forum dóu Tambourin se debano au Pasino (21 avengudo de l'Éuropo) à 3 ouro dóu tantost (intrado à gratis). Es fa d'uno sceno d'espetacle duberto presentado pèr Frederi Soulié, de France 3, de troupe de musico counfirmado vo nouvelamen creado iluston l'aspèt counvencionau vo francamen atuuu dóu tambourin davans de centenan d'espetatour. Pièi, en meme tèms dins l'Espace Manhattan, de noumbrous estand de fatour d'estrumen, (Guy Offredi, Jean-Pierre Magnan, André Fabre, Francis Martino, Rodolphe Stoitzner... emai lis establiment Marcel Dumas), d'editour de musico pèr tambourin, d'assouciacioun especialisado vo de discourgrafio vènon au rescontre dóu publi pèr presenta la largo gamo de sa prouducioun.

Unique en soun gènre, aquel evenimen annuau, veirino d'un patrimòni, counvido à la descuberto d'un mitan artisti trop descouneigu. Lou Festenu dóu Tambourin adus divertissamen e enrichissamen. Siegues au rendès-vous !

Entre-signa au 04.42.26.23.41

Festenu dóu Tambourin



Lou boulenen

Li flour e li lengo espelisson à boudre au mes d'abriéu.

Pajo 2

Lou Japoun

La mai grando catastrofo de noste tèms lèvo l'ausido.

Pajo 7

Lou filme

"Au bistro du coin" asata dóu francés en 6 lengo regionalo.

Pajo 9

Buget pèr la lengo au Councèu regionau

Es mai eisa de demanda au Councèu regionau de Prouvènço-Aup-Costo d'Azur de reconeisse la lengo d'oc o lengo òcitan coume lengo òuficialo de la Region, acò manjo pas de pan, que de ié tira d'argènt pèr sauva aquelo lengo istourico dóu país. Acò s'es vist e subre-tout entendu pèr la voutacioun dóu buget de l'ourganisme regionau.

"On aime bien le provençal à condition qu'on ne l'aide pas, il pourrait faire de l'ombre au français..." que diguè lou Councèu regionau Estefane Durbec lou 18 de febré 2011.

Acò, estènt que lou Councèu regionau dóu Partit Òcitan, Arvèi Guerrera, venié de depausa un amendamen que demandavo un buget pèr la lengo regionalo : "Nosto lengo es en dangié de mort. Impoussible de la leissa mourir qu'es un liame fort entre li diferents abitant de Prouvènço, es au cor d'uno culturo regionalo de partèja".

Se dis que lou president de la region, n'en vouliè pas d'aquelo dispousicioun dins lou buget primitiu, mai lou groupe d'Éuropo-ecou-lougio de-coutrio emé lou Poc butèron à la rodo en menaçant de pas vouta la totalita dóu buget de la Region.

La manobro capitè, l'amendamen fuguè aceta e lou mountant di sòu alouga pèr la lengo regionalo arresta : 800.000 euró pèr la ligno bugetàri de founcionamen e 130.000 euró pèr la ligno bugetàri d'investissamen.

Au bout dóu comte, lou Councèu regionau, carga de messioun pèr la culturo prouvençalo, Bernat Jaussaud, aura mai d'ande. Segur que voudrian pica di man pèr aquelo acioun meritouso d'Arvèi Guerrera, mai, éu, rèsto mesfisènt "fau encaro espera qu'aquéli sòu serviguèsson pas pèr paga la renouvacioun de bastimen dóu patrimòni", valènt-à-dire coume l'a fa lou Councèu generau di Bouco-dou-Rose en desvirant la mita dóu buget "lengo e culturo regionalo" pèr renouva un museon d'Arle.

Basto ! pèr aro sian cresta ! Lou Councèu regionau de Prouvènço-Aup-Costo d'Azur fai lusi de sòu pèr nosto lengo !

B. G.